

PLAVTI BACCHIDIBVS DISPVTATIO.

QVA

ORATIONEM MVNERIS PROFESSORII ORDINARII IN VNIVERSITATE LITTERARVM VRATISLAVIENSI SVSCEPTI CAVSSA

DIE XXII. M. IANVAR. A. CIOIOCCCXXXVI. HORA XL

IN AVLA MINORE

PVBLICE A SE HABENDAM

INDICIT

FRIDERICVS RITSCHELIVS

PHILOSOPHIAE DOCTOR ET PROFESSOR PVBL. ORD., SEMINARII REG. PHILOGICI CON-
DIRECTOR, MVSEI ARCHAEOLOGICI NYMISMATICIQUE DIRECTOR.

VRATISLAVIAE

EXPRESSVM FORMIS GRASSII, BARTHII ET SOC.

RECEIVED MAY 19 1914

OFFICE

1914

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

RECEIVED

§ 1.

Inter Plauti fabulas quae aetatem tulerunt uiginti cur nonum locum Bacchides obtineat, probabiliter nuper significatum est Muellero in Varron. de ling. lat. annotatione p. 304. Et uniuersum quidem fabularum ordinem neminem unquam fugit ex grammatica litterarum serie aptum esse. Quod disponendi genus satis ueteribus usitatum praeter alia ab Welckero commemorata Prolegom. in Theognid. p. CV. in Anthologia Graeca post Iacobium Passouius demonstrauit, ad Ciceronis adeo orationes Niebuhrius accommodauit. E compluribus autem formis illius generis, de quibus post Rankium Comm. de Hesych. p. 70. 84. ipse explicatius alio loco egi, unam eamque minime raram scimus hanc fuisse, ut neglectis reliquis prima quaeque singularum uocum littera spectaretur sola. Quocirca etsi non est quod miremur nominum hos ordines: Captiui, Curculio, Casina (nisi quidem Sam. Petiti inuentum arriserit Canissam substituentis ioculariter Miscellan. II, c. 19.) Cistellaria: Mostellaria, Menaechmi, Miles, Mercator: Pseudolus, Poenulus, Persa: Bacchides tamen non uidetur alia causa exputari posse cur mediam inter Epidicum et Mostellariam esse, quicumque hodiernum ordinem instituit, uoluerit, nisi quod uel seiungere ab Epidico uel huic adeo praemittere eam fabulam uereretur, in qua tanquam prius editae Epidici ipsius mentio fieret II, 2, 36:

Non erus, sed actor mihi cor odio sauciat.

Etiam Epidicum, quam ego fabulam aequae ac me ipsum amo,

Nullam aequae inuitus specto, si agit Pellio,

Vbi non ausim *Pellio*, pro quo editiones Aldo priores tenent *pelio*, cum Iano Gulielmo Plaut. Quaest. in Bacch. cap. I, p. 150., Bothio et Windischmanno in Museo Rhen. a. 1833. p. 112. mutare in *Pollio*, quamuis de Symmachi Publilio Pollione agi probabile sit. Dubia uis est comparati a Gulielmo *Apellinem* ap. Fest. p. 19. Lind.: alienissimum Prisciani I, 6, 34. p. 33. Kr. *compes* pro *compos*, allatum a Conr. Schneidero Elem. gramm. lat. I, p. 12.: sed satis congruunt Festi p. 74. 75. glossae *helus*, *hemo* pro *holus* (*olus*), *homo*, rem conficere illud uidetur, quod gentilitii nominis non tantum *Pollius*, sed etiam *Pellius* forma reperitur in Gruteri Inscriptionibus, iis exemplis quae consignata habes in Scaligeri indice p. CCXXXIII. Sed ut illuc reuertar, ab ipso Varrone profectum esse totum, qui hodie obtinet fabularum

Plautinarum ordo, aegre persuaserit Muellerus. Qui etsi Varronem lib. VII. de ling. lat. § 107. et 108. in commemorandis Naeui fabulis secutum esse litterarum ordinem initialium coniecit non sine magna ueri specie, tamen de Plautinis differens ideo minus mihi satisfecit, quod, qui temporum rationi tantum tribuisse putatur, ut tam graui inconstantia simplicis ordinis concinnitatem turbaret, profecto eandem temporum normam uidetur ad uniuersi generis dispositionem adhibiturus fuisse. An quis dubitabit, quin potuerit, ut uoluisset aliquantisper statuamus, certissima annorum descriptione singulas fabulas Varro definire? cui praesto fuerint L. Attii, natu maioris quidem, sed eiusdem etiam aequalis poetae et amici, Didascalicon libri Graecorum exemplo compositi, de quibus post praeclaram*) Maduigii disputationem (Opusc. acad. p. 87. sqq.) nihil iam controuersiae superesse credo; qui praeterea ipse non tantum de poetis, de scenicis originibus, de comoediis Plautinis, sed etiam de actionibus scenicis dedita opera quaesierit et singulis commentariis exposuerit; eas denique fabulas, quarum uel nobis, si recte coniecit Windischmannus l. c. p. 110. sqq., duae seruatae didascalicae suppetant. Quare si quid uideo, aut alio omnino ordine superstites Plauti fabulas Varro disposuit: nam superstites XX. cum Vidularia quin ipsae illae XXI. Varronianae sint, non uideo cum Grauerto (Diar. scholast. a. 1828. p. 1166. et Anal. hist. et philol. p. 130.) dubitandi rationem: aut, quod amplector lubentius, ne Bacchides quidem ex reliquarum societate exemit, sed ante Captiuos collocauit. Vnde posteriore demum tempore auulsa religiosi siue grammatici siue librarii sedulitate locum post Epidicum inuenit. Quod num iam saeculo p. Ch. quinto factum sit, quo antiquissimum librum Ambrosianum postea rescriptum, quem Antoninorum aetati liberalius tribuerat Angelus Maius Plant. Fragm. p. 10., modestius Niebuhrius rettulit Opusc. hist. et philol. p. 174.: ex Maii quidem narratione non apparet. Sed factum sit oportet ante ea tempora, quibus dirimi in duas partes Plauti fabulae coeptae sunt, quarum altera octo fabulas nunc priores ab Amphitruone ad Epidicum complectens nulla aetate non legi describique solita est, altera a Bacchidibus pertinens ad Truculentum per quingentos ut perhibetur annos delituit, soloque Germanicorum beneficio coenobiorum ab interitu uindicata, saeculo demum XV. Italis hominibus, ut accuratius alibi exposui, denuo innotuit.

§ 2.

Facile intelligitur, si alterius Plautinarum fabularum uoluminis initio collocata Bacchides erat, quomodo eius comoediae ipsum caput perire potuerit. Quemadmodum

*) Praeclaram cum dico, recedo ab uno loco p. 109., ubi Attii (apud Nonium p. 150, 12.) tetrametros potuisse hos esse credidit:

*Et eo plectuntur poetae, quam suo uitio, saepius,
Ductabilitate nimia uestra aut perperitudine.*

Nam de tertia uocis ductabilitate syllaba ictu producta fefellit eum opinio. Scribe:

Aut ductabilitate nimia uestra aut perperitudine.

Nisi quidem ulterius continuata oratione a Quod uel Cum uel Vt uersus incipiebat.

Varronianarum XXI. unam, Vidulariam, item notimus non aliam ob causam inter-
cidisse, nisi quod extremum locum teneret uoluminis Plautini temporum iniuria laceri
facti. Deesse autem Bacchidibus aliquantum ad integritatem, inde ab saeculo XV.
creditum est. Quod quidem primum inscriptio fabulae testatur, *Bacchides Dimidiatae*,
quae est in Bartholomaei Schobingeri Icti codice apud Pareum, in Merulae editione
principe, Scutarii Mediolanensi a. 1490., Veneta a. 1496., Saraceni Veneta a. 1499.,
Pii Mediolanensi a. 1500., Beroaldi Bononiensi a. 1500., Pyladis Brixienfi a. 1506.,
Vgoleti Parmensi a. 1510., Carpentarii Lugdunensi a. 1513. et eiusdem Parisina,
Angelii (uel Iuntae) Florentinis a. 1514. 1522. 1554., Aldi Veneta a. 1522.; pro
qua leui lapsu in Venetis a. 1511. et 1518. est *Bacchides Dimiatae*. Haec inscriptio
quomodo accipienda sit, docent antiquiorum interpretum notationes Bernardi Sara-
ceni et Ioannis Baptistae Pii. Ille enim argumento ab semet facto haec praemisit:
*Haec una de duodecim comoediis postremo habitis caret principio et in plerisque locis
dimidiata est ut reliquae subsequentes: quae hoc nostro pro suo contenta erit argu-
mento.* Pius autem enarrato omni Bacchidum argumento primum haec subiicit bar-
baro ut assolet sermone, quae sane ad finem potius uidentur quam ad initium fabulae
spectare: *Sed ut poetarum festiuissimus et amabilissimus est plautus reliquit inabsolu-
tam ut puto comaediam scilicet exemplum secutus apellaeum: qui opera graphice et
consummatissime politurae semipolita posteritati commendauit ut superesset artifici re-
gressus ad ueniam: et ut daret existimandum quod et quantum fuisset opus ni mortis
intempestiuitas obstrepuisset: et artifici ad sequiora tendentem interpellasset.* Paullo
autem post sic pergit: *Inditium quod haec fabula dimidiata sit est Nonnius Mar-
cellus: qui in bacchidibus plautina fabula citat haec carmina: quae non exstant.*
*Limaces uiri: quos dictos autumat quod atterant et consumment: et hoc: quibus
ingens in animo nobili modicum sine uernulitate: et hoc praenestinum
opino esse ita erat gulofus: haec omnia desunt in tritis exemplaribus.* Apparet
uetusissimorum editorum sententiam hanc fuisse, ut ferme dimidiam partem Bacchi-
dum deesse existimarent, et ab initio quidem ut puto fabulae deesse, quandoquidem
uel Argumentum uersibus astrictum, quo reliquarum nulla fabularum caret, desidera-
retur oportebat. Nec discrepans Pii fuit iudicium. Qui etsi ambigua sententia dimi-
diatam uocare fabulam uideri potest: tamen ex iis, quae infra § 4. afferentur, intelli-
gitur non alio in loco nisi ab initio mutilam habuisse et ad hanc partem deperditam
uersus ab Nonio seruatos rettulisse. Sed Saracenum non item est ambiguum aliquan-
tum diuersam in sententiam *dimidiatus* uocem interpretatum esse. Is enim cum prin-
cipium fabulae desiderat, significare solum argumentum uidetur; cum autem etiam
aliis in locis plerisque dimidiatam iudicat ut reliquas subsequentes, de uniuersa con-
dicione cogitat posteriorum XII. comoediarum, easque in codicibus peius habitas ma-
gisque quam priores octo esse mutilas et truncatas significauit. Eodem prorsus modo
de Plauti fabulis *dimidiatis* iam in edit. princ. praef. Merula locutus erat. Quem
dimidiatus uocabuli significatum, ut sit simpliciter *diuisus*, *sectus*, etsi ex Tertulliano
firmare uelle Ducangius uidetur Gloss. med. et inf. lat. II, p. 1506., tamen in illis
quidem duobus exemplis, quae sunt de carne Christi c. 5. (*quid dimidias mendacio*

Christum?) et adu. Marc. I, c. 24. (unde haec dimidiatio salutis?) de bipartita tum Christi natura tum salutis condicione agitur. Prorsus autem singulare est, quod eius prologi auctor, ad quem iudicandum statim accedemus, geminas forores Bacchides dimidiatas dixit u. 50.

§ 3.

Eorum, quae antea disputauimus, ueritas eo arguitur, quod breui interiecto temporis interuallo Bacchides prodiit amplis redintegrata uidelicet supplementis, nec extremae fabulae subnexis nec insertis mediae, sed in ipso-capite collocatis. Quae enim uulgo praemissa feruntur Argumentum, Prologus et Scenae primae septem et uiginti uersus priores, ea primus uulgauit in Iuntina prima a. 1514. Nicolaus Angelius, idque in praefatione ipse his testatur: *Hoc de plurimis uere licet gloriari quod nos omnium primi quos legerimus prologum bacchidibus Dimidiatis et primi actus initium diligentia nostra repertum restituiamus.* Vere autem illa ab Angelio reperta dici nec esse ab ipso facta, documento uel hoc esse potest, quod uersum a fine quartum cum lacuna, qualem in chartis eum inuenisse apparet, typis repeti iussit:

Si astartan on Bromion, Deosque uoluptarios.

Quod quominus callide institutum suspicere dissimulandae fraudis caussa, Angelii additamenta reputes ab ipso editore inscribi *Argumentum subditiuom; prologus subditiuos, Scena itidem subditiua.* Repertis igitur in aliquo codice supplementis quaeritur quae sit fides tum habita tum habenda. Ac proximo quidem interuallo Iuntinam excipiens Venetae a. 1518. editor Lucas Olchinensis Canonicus quam illis nihil tribuerit, testatur ipsa litterarum dissimilitudo, quibus ea exprimi curauit seiuncta ab reliquorum continuitate; prorsus omiserunt Aldus eumque secuti Cratander in Basileensi a. 1523., Stephanus in Parisina a. 1530., item Lambinus; Gibertus autem Longolius etsi in Colonienfes a. 1530. et 1538. (e quibus pependerunt Heruagli Basileenses a. 1535. et 1550. Gryphique Lugdunenfes a. 1535. 1537. 1540.) recepit, tamen ne quis falleretur, cauit his uerbis: *Argumentum sequens cum prologo et primi actus initio, quoniam carmina illa non satis redolere Plautinam elegantiam nobis uisa sunt, subditiua putamus.* Aliquanto ab his discreparunt acerrimorum uirorum iudicia Ios. Iusti Scaligeri et Adriani Turnebi, quorum ille Catalect. *prologum Bacchidibus Plauti praepositum οὐτε πρῶην οὐτε χθές* factum dicit, hoc est, ut ipse interpretatur epistola ad Taubmannum in huius edit. II. p. 1314., *non quidem recentioris, sed tamen sequioris aevi;* hic autem Aduersar. lib. II, cap. 15. p. 31. b. *extat inquit in Bacchid. prologus non ille quidem a Plauto scriptus, qui tamen antiquitatem olet;* et lib. XIII, cap. 22. p. 246. b.: *prologus qui Plauti Bacchidibus praetextitur, non ille quidem a Plauto scriptus: apagesis illum a tam eleganti latinoque comico: ueruntamen a ueteri aliquo scriptore profectus, non recenti memoria natus.* Quorum non ueritas auctoritatem modestius, ut consueuit, Camerarius, quae uero ait *addita leguntur in editis libris, ut licet per me de iis sentiat quisque quod uoluerit: ita uel mediocriter literis Latinis erudito dubium esse non potest, Plautina illa non esse;* multo

autem confidentius nostra demum aetate Niebuhrius tralaticiam fidem supplementorum illorum adortus est. De cuius commentatione, quae de scenis suppositis Plautinarum fabularum scripta primum in Actis Academ. Berolinens. a. 1816. prodit, nunc repetita est in Opusculis historicis et philologicis, non diffiteor me sic sentire, ut eam nequam ex omni, ac ne maxima quidem ex parte probandam putem. Nam cum persuasissimum habeam, ex omnibus, quae suppositarum nomine comprehendi solitae sunt, unam illam scenam, quae est in fine Poenuli, ex ipsa antiquitate esse reperiendam: tum nihil unquam meo iudicio institui a tanto viro infelicius potuit, quam quod eam scenam, quae subiicitur Aululariae praeter Codri Vrci supplementa, tribuere Plauto, eas autem, quae mediae Mercatori inculcantur, certe ad Plautinam aetatem referre est aggressus, utraque autem absolutissimis nescio quorum *senariorum Italicorum* numeris compositas pronuntiavit, quae nullos unquam numeros uel habuerunt uel ullis machinis recuperabunt. Sed mitto haec, quae non sunt necessario cum propoſita quaestione uinculo coniuncta.

§ 4.

Ad Bacchides autem quod attinet, Niebuhrii equidem sententiam non tantum ex animo amplector, sed etiam satis mirari nequeo, qui tandem aliquot haud exigui acuminis et doctrinae uiri aliquamdiu caecutire de iis si dis placet carminibus potuerint, quorum extrema futilitas sua sponte quasi incurrit in oculos. Nam siue inuentionem spectas poeticam: nihil excogitari ab ipsius fabulae argumento et nexu alienius potuit, nihil magis abhorrens ab antiquitatis sensu, moribus ueteris comoediae nihil repugnanti-
us, nihil sententiarum uel insulſitate frigidius uel obscuritate impeditius uel earundem molestius repetitione; siue uerba et numeros contemplaris, nihil sermonis aut inficitius ieiunitate aut insolentia importunius, prosodiae autem et metrorum puerili imperitia nihil turpius, immo flagitiosius. Cuius generis pauca specimina ex infinita multitudine decerpta animi causa infra posui, quae apparet receptam nouicio usu et consuetudine pronuntiationem sequi solam:

Frequenter frémunt atque mále múſſitant.

Aequom ést, uos deo fácere ſiléntium.

Eccé ſabór iam uobis quód expétitis.

Quicquid huiúſce géntes férunt ínclýtae,

Nonnihil nóſtro géſta ſúnt conſílio.

Nunquám quod mihi pláacet, illi diſplicet.

Diutius uersari in comprobandis iis, quae supra dixi, et me indignum puto et lectoribus et hodierna horum studiorum luce: tametsi scio in istis ineptiis emaculandis et resarciendis aliquid studii I. H. Vossium, multo autem plus posuisse Bothium, eundemque in ea Plauti editione, quam elegantiorum hominum in usum parauit, ipsum Scaligeri iudicium comprobasse.

Nunc autem ulterius etiam progrediar, atque, a quo ficticia illa supplementa profecta sint, patefaciam. Eiusmodi aliquid primus significauit Gibertus Longolius,

hic commentatus in editione Colonienſi priorē a. 1530., Annot. in Bacch. Init.: *Primus actus Bacchidam deſideratur cum prologo, caeterum quod nos ſubneximus, non eſt Plautinum, praeter id, quod ipſa dictio per ſe ſatis teſtatur, etiam in Romano codice tantum hoc deerat, pauci tamen mutilique uerſus referebant adhuc neſcio quid Plautinum.* Quod autem habemus dedit Laſcaris grammaticus ille graecus, ut teſtatur in epiſtola ad Bembum, quod Meſſanae in Sicilia inuenit. Sunt multi, qui a Franciſco Petrarcha effectum putent. Repetita haec in altera Longolii Colonienſi a. 1538. ita ſunt p. 344., ut ex parte intelligi nequeant. Pro illis enim: *praeter id, quod ipſa dictio poſita haec ſunt non mutatis reliquis: praeter id: Nam quod ipſa dictio.* Sed hoc ut ſit caſu factum, aliquanto grauius eſt, quod, quae in edit. I. dicitur *epiſtola ad Bembum*, in altera facta eſt *epiſtola quaedam Plauto praefixa.* Eiufmodi epiſtola cum impreſſo Plauto nulli praemittatur, conſequitur aut manu ſcriptum Plautum aut ſcriptam certe in impreſſo Plauti exemplo epiſtolam ſignificari: ut non ſit mirum, nec in Petri Bembi ſcriptis Niebubrium, nec alicubi uel me uel uerſatiſſimum in Italicarum litterarum hiſtoria Theoph. Friedlaenderum Berolinenſem, qui mea cauſſa illam in rem inquiſiuit, eius uel minimum ueſtigium indagaffe. Conſtantineſis autem Laſcaris (qui quidem Liſcaris non Taubmanno tantum, ſed hodierno homini Bothio dicitur) cur non magis poſſit quam Petrarca auctor ipſe haberi eorum, quae a ſe detecta eſt profeſſus, appoſite Niebuhrius p. 171. ſq. diſputauit. Quis autem fuerit auctor, etſi non ea, quam hic commendabat uia repperi: ut in Italorum illius ſaeculi philologorum ſimul et poetarum lectionem me inſinuarem, ex ipſaque uerſuum indole coniecturam caperem: tamen haud paullo, ut puto, certiore afferendi teſtimonii utar. Atque aperuit iam ante CCCXXV. annos Plauti interpres Io. Bapt. Pius, illis quae § 2. poſteriore loco poſuimus uerbis haec continuans: *Circumferuntur integrae bacchides carminibus additis a panormitha: quae non adſtituere uſum cum abſque controuerſia Plautina dignitate careant. Quid cum leonibus uulpes iungam? Sincerum cuperem uas incruſtare.* Maniſteſtum eſt Antonium illum Beccadellum ſignificari, qui Panormitam ſe uocari a patria maluit, academiae Neapolitanae, cui poſtea Iouianus Pontanus praeerat, ſocii autem aſcripti praeter alios a praeſtantiſſimo Tiraboſco commemoratos Hiſt. litter. Ital. Vol. VI. part. I, p. 105. ſq. (lib. I, c. 3. § 27.) Laurentius Valla et Ianus Parrhaſius fuerunt, conditorem, cariſſimum Alphonſo regi: de cuius uita et ſcriptis idem Tiraboſcus erudite expoſuit Vol. VI. part. II, p. 687. ſqq. (lib. III, c. 1. § 57. 58.) Apprime autem huc conuenit, quod de eo Paulus Corteſius, aequalis Panormitae, iudicium fecit, ex libro de hominibus doctis a Tiraboſco p. 691. excerptum: *In aliquo igitur numero fuit Antonius Panormita, homo doctus, et Iuris bene peritus. Diligenter etiam ſatis loquutus eſt, et ut eſſet paullo polior, elegantiam ſermonis Plautinam uolebat imitari, ſed ab eo aberat illa orationis integritas, ac ſententioſa concinnitas: itaque ſunt epiſtolae eius languidiores. Fuit tamen perargutus Poeta, et illis temporibus non contemptus: nam is primus uerſus ad meſuram quandam numeroſumque ſonum reuocauit; antea enim fractis concifiſque numeris parum admodum uerſus a plebeiis rhythmis differebant, quamquam eius fere tota Poeſis eſt obſcena.* Tertius igitur nunc in Antonii ſ. Codri Vrcei et Hermolai

Barbari societatem Antonius ille Panormita asciscendus. Nam de Hermolao etsi in e-
 siue Morellius siue Niebuhrius p. 177. fallitur, quod illum Amphitruonis scenarum
 auctorem se profiteri dixit: neque enim uel huius uel alius certae fabulae ullum indi-
 cium exstat in Hermolai ad M. L. Phosphorum episcopum Signinum epistola, quae
 est inter Angeli Politiani epistolas lib. XII, 25. p. 419. ed. Gryph. a. 1536.: tamen
 uerum est omnino *octonariolos suos* commemorare Hermolaum, quibus Plauti siue unam
 siue plures comoedias, quae *ambustae et mutilatae* circumferrentur, reconcinnarit inter-
 polaritque de suo. Non autem aegre intelligitur, quomodo, quos uersiculos natu
 Siculus homo Neapoli composuisset, in eos Messanae forte incidere Lascaris potuerit.
 Ac forsitan aliquid lucis in hanc quaestionem redundare ex eo codice potuerit, quem
 duodecim fabulas posteriores complectentem Messanae Goettlingius uidit, nunc relatum
 in Blumii Biblioth. libr. mss. Ital. p. 227. Nec quicquam caussae esse uideo, cur
 dolo, malo potius egisse, quam luisse animi caussa Panormitam suspicemur, uel de
 fraudis particeps Lascare cogitemus cum Niebuhrio; eo minus caussae, quod non
 obscuram fuisse illius supplementi originem ipso Pii exemplo doceri uidemur, cui qui-
 dem reliquarum scenarum suppositarum auctores, quantum ex eius commentariis licet
 iudicare, non item cogniti fuerunt. Quod ualere etiam in Aululariae illam scenam
 uolo, quam errarunt omnes qui ab Carpentario primum editam narrarunt. Ceterum
 quem Longolius codicem Romanum antestatur, de eo hic dicere eo minus attinet, quo
 diligentius in eum alio loco inquisiuimus.

§ 5.

Vnum quiddam restat, silentio non praetermittendum, quia coniunctum est cum
 utiliore quaestione. Lepidum enim illum Bacchidum instauratorem ne origo quidem
 fabulae Graeca fugit Prologi u. 36.:

Philemon Graecam olim dedit fabulam.

Hanc qui graecissant, Euanctides nuncupant:

Plotus, qui latinissat, uocat Bacchides.

Nihil hoc scrupuli iniecit Parei credulitati in editione III., quam collectis *imitationis*
Plautinae exemplis ditauit; ficticium dicere Niebuhrius non dubitauit. Nec praeterire
 quemquam potest, fictum Graecae fabulae nomen esse ab eo, qui latinum Bacchides
 uertere uolens, non ualens, de Bacchi nomine Euan cogitaret: cuius dei a Plautina
 fabula alienissimi in toto prologo ineptissimum in modum mentio frequentatur. Quod
 autem cuius Graeci poetae exemplum exprefferit Plautus, etsi non est testimonio pro-
 ditum, tamen haud improbabili ut arbitror coniectura assequi licet. Reddidit enim,
 nisi fallor, Menandri *ἡς ἑκαταῶντα*. Nam primum ipsa inscriptio in Bacchides
 quadrat ut quae maxime; quippe omnis argumenti inuentio et tractatio fundamento
 nititur hoc, quod ab uno callidissimo seruo Chrysale uno eodemque die eademque in
 causa bis decipitur Nicobulus senex. Quod in ipsa fabula tum Nicobulus fatetur

tum Chrysalus gloriatur tum seni exprobrat canillabunda una Bacchidum. Sic enim V, 1, 4. senex:

*Perii: pudet: hocine me aetatis ludos bis factum esse indigne. *)*

- *) *Ludos* asciscendum ex utroque Palatino pro vulgato inde ab editione principe *ludum*: cuius corruptelae fontem monstrat Lipfienfis, in quo est *ludus*. Duae sunt locutiones, in quibus constans usus Plautinus respuit singularem numerum, *ludos facere alicui*, et *aliquem ludos facere*. Illam habes Merc. II, 1, 1. et Rud. III, 1, 1.:

Miris modis di ludos faciunt hominibus.

Trucul. IV, 2, 46:

Iam hercle ego tibi, inlecebra, ludos faciam clamore in via.

Mostell. II, 1, 80.:

Ludos ego hodie uiuo praesenti seni

Faciam:

uere enim nunc receptus est datiuus, quem a manu secunda Vetus Cod. tenet, pro eo quod est in Decurtato, Lipfienfi, Principe, *senex*: neque enim illius libri manus secunda fere est recentior quaedam, sed optimarum saepe scripturarum seruatrix. Similiter est in Casin. IV, 1, 3.:

Quam hic intus fiunt ludi ludificabiles

Seni nostro.

Frequentior etiam altera locutio est, quanquam aliquoties affecta librariorum uitio. Amphitr. II, 1, 21.:

Rogasne improbe etiam, qui ludos facis me:

sic enim Vetus: reliquorum pars Palatinorum *ludificas*, alia pars cum Lipfienfi et Principe *ludificas*. Aulul. II, 2, 75.:

Quem senecta aetate ludos facias haud merito meo.

Capt. III, 4, 47.:

Ut scolestus, Hégio, nuno iste te ludos facit:

ubi iste pro vulgato *is* commodè praebuit Lipfienfis, nihili faciendae aliorum quorundam criticorum nugae sunt. Bacchid. V, 1, 14.:

Me hoc aetatis ludificari, immo edepol sic ludos factum:

ubi in Decurtato erratum est *ludus*. Menaechm. II, 3, 34.:

Idem me amabo desine ludos facere atque i hac mecum semul:

rectius enim *me*, quod ab omnibus libris abest, Gruterus addidit, quam iam geminarat Camerarius. Pers. V, 2, 23.:

Ludos me facitis, intellego.

Rud. II, 5, 13. Vetus Cod. (nam in Decurtato, Lipfienfi, Principe hic quaedam desunt):

Nusquam hercle equidem illam uideo: ludos me facit.

Pseudoli IV, 7, 71. Iq.:

S. *Exploratore hunc faciamus ludos suppositicium.*

B. *Adeo, donicum ipse sese ludos fieri senserit:*

quorum priore uersu ludos coniecit Lambinus et ante eum eius recensionis auctor, quam

Bacchis autem V, 2, 9.:

Pol. hodie altera iam bis deſonſa certo eſt.)*

Denique ὁ δὲς ἑξακταῶν ipſe IV, 9, 4.:

*Sed Priamus hic multo illi praeſtat: nōn quinquaginta modo,
Quadrigētos filios habet, atque equidem omnis lēctos ſine probro.
Eos ego hodie omnis contruncabo duobus ſolis ictibus.**)*

Lipſienſis codex tenet: reliqui libri *ludo*. Sed *ludo facere aliquem* Plautus alibi non magis dixit, quam *ludum aliquem facere*: tametſi in Argum. Moſtell. 7. legitur

Ludusque ruruſum ſit ſenex:

ubi permirum eſt in Decurtato (quanquam in hoc ambigue), Lipſienſi, Principe, itemque a manu prima in Vetere legi *ludusque*, quod non habeo quomodo explicem, niſi ut ex uetuiſſima linguae aetate repetam, cuius non adeo pauca ueſtigia in optimis libris Plautinis reſident. Sed argumenta quidem acroſtica Plautinis fabulis praeſmiſſa, quale illud eſt Moſtellariae, nondum potui adduci, ut cum Lingio Quaef. Plaut. p. 21. ſq. ab ipſo Plauto profecta crederem. Plautus autem quam fuerit in hoc genere tenax pluralis numeri, ex aliis quoque duabus loquendi formis apparet ad illius, quam tractauimus, ſimilitudinem factis. Rudentis enim III, 5, 12. dixit:

Si te non ludos peſſimos dimiſero:

ita enim pro *non te* tranſponitur in Ambroſiano: eiufdemque fabulae IV, 1, 9., quod adiicio timidius,

Nam nunc et operam ludos ddt et retia.

Quantum enim offenſionis breuis ſyllabae productio habet, tantum ponderis addit utriuſque Palatini et Lipſienſis conſentiens auctoritas. Nam quod uulgatur *ludos facit*, in ſola conſignatum editione principe eſt: quae etſi in hac quidem fabula e bono fonte fluxit, tamen nec alibi uacat nec hic uacare uidetur ipſius Merulae correcturis. Atque auget ſuſpicionem, quod peruulgatus illa aetate ſcriptor Priſcianus (cuius mediocriſ in afferendis uerſibus Plautinis fides eſt) non tantum *facit* illud, ſed etiam *retia*, plane ut ſcriptum eſt apud Merulam, prodidit VII, 11, 55. (I, p. 328.) Kr. Vt uix dubitem, quin ipſius teſtimonio grammatici Principis ſcriptura debeatur. Ac certe non praetermittendum eſt ſententiae aliquod diſcrimen utriuſque locutionis: quippe in reliquis exemplis cunctis non res quaeſcunq., ſed ſolos homines ludos fieri poeta dixit.

*) Sic haec deſcribenda integri tetrametri bacchiaci in formam. Quodſi cui hiatus diſplicuerit inter duos pedes medius, rectius certe *altera haec iam* ſcribet, quam Bothii nuperum inuentum amplectetur *alterd iam*.

**) *Quadrigētos* ſcripti cum Conr. Schneidero Gramm. lat. Elem. I, p. 735. Reiziique exemplo in Rud. V, 3 (2), 37. Leuius eſt, quod Bacch. IV, 9, 10. *quadragentis tenent* alter Palatinus et Lipſienſis; grauius, quod V, 2, 64. in illo ipſa *quadrigentis* forma ſeruata eſt. — Ceterum cur ſic, ut feci, dimetiendum putem, nec hanc potius in ſpeciem:

Quadrigētos filiōs habet atque equidem omnis lectos ſine probro:

non eſt difficile intellectu. *ſilius* binis ſyllabis pronuntiat, ut ſexies praeterea in hac una fabula: *equidem* autem, non *quidem*, conſentiens librorum ſcriptura eſt.

Sed grauius est, quod e Menandria fabula quaedam seruata sunt, quae monstrare posse in Bacchidibus uideare. Nam qui a compluribus, quos habes apud Meinekium p. 48., scriptoribus affertur, ad *Δις ἑξαπατῶντα* autem a Stobaeo Serm. CXX, 8. p. 460. Gaisf. refertur Menandri uersus:

ὃν οἱ θεοὶ φιλοῦσιν, ἀποδνήσκει νέος,

eum in Bacchid. IV, 7, 18. reperimus sic conuersum:

Quem di diligunt,

Adulescens moritur, — (dum ualeat, sentit, sapit.)

Recte enim ita transposuisse Pyladem arbitror, quae in codd. et uet. edd. scribuntur *quem diligunt di* vel *dii*.

Alteram congruentiam quandam non afferendam propter singularem aliquam probandi uim, sed tamen, quamuis dubitationis plenam, non leuiter praetermittendam duco. In Bacch. II, 3, 74. memoratur Ephesius carissimus sacerdos Dianae Ephesiae, siue Megalobuli siue, ut aliis uisum, Megalobuzi uel Megabyzi filius, cui pecuniae uim seruandam crediderit Mnefilochus cum Chryfalo. Constat autem aliunde, *Μεγάβυζος* nomen fuisse illius Dianae siue sacerdoti siue, quod est ueri similis, sacerdotium genti: quode satis egerunt Turnebus Aduersar. XVIII, cap. 31. p. 352., Meursius Exercit. crit. P. I. siue Cur. Plaut. Comment. in Bacch. cap. 3. p. 128. sq., Casaubonus et Menagius in Diog. Laert. II, 51., Albertus in Hesych. uol. II, p. 552., Burmannus in Quintiliani Inst. orat. V, 12, 21., Harduinus in Plinii Nat. hist. XXXV, 10, 36. p. 697. et 11, 40. p. 704., Perizonius in Aelian. Var. hist. II, 2., Hemsterhusius in Lucian. Timon. cap. 22. uol. I, p. 134. sq., Wyttenbachius in Plutarch. de discern. adul. ab amic. p. 58. D. (Animadu. in Moral. uol. I, p. 471.), Schweighaeuserus in Appian. de bell. ciuil. V, 9. p. 723. Ad eos autem sacerdotes communem tradendarum concredendarumque pecuniarum morem pertinuisse, profugi exemplum Xenophontis docet apud Diogenem et in ipsius Expedit. Cyr. V, 3, 6. In haec sane uix uidetur casu conuenire, quod Megabyzi aeditui mentio facta est Menandri *Δις ἑξαπατῶντι* testibus Photio p. 50, 6. et Suida u. *ζάκορος*, quorum haec sunt uerba: *ζάκορος: νεωκόρος. Μένανδρος δις ἑξαπατῶντι*.

οὐ Μεγάβυζος ἦν,

ὅστις γένοιτο ζάκορος.

Sic enim haec uerissime Bentleius disposuit, comprobatus a Meinekio. De interpretatione autem nec Hemsterhusio assentior, *Μεγάβυζον* pro eunucho positum putanti, nec Toupio Emend. in Suid. P. II. p. 153. Lips. sic uertenti: *alius est Μεγάβυζος, alius ζάκορος*, uel: *qui ζάκορος, non idem utique Μεγάβυζος*. Quid est enim, cur de sententia communi quadam cogitemus? Immo uerba in mutuis comoediae sermonibus posita aut sic uerto: *nullus (Ephesi) Megabyzus fuit, qui aedituus esset Dianae, aut quod multo magis placet: non Megabyzus aliquis fuit, qui aedituus Dianae Ephesiae esset?* h. e. ut arbitror, *cui crederetur pecunia?* Quam sententiam si cum Plautina

scena in Bacchidibus conferimus, non est difficile intellectu, quomodo, siquidem Menandri fabulam latinus poeta expresserit, apud utrumque omnis rei ratio comparata esse potuerit. Quaerit apud Menandrum Mnesilochi pater, quod sua sponte narrantem Chrysalum Plautus fecit non prius de Megabyzo interrogatum. Vides, quantumvis potuerit profecto-exemplum suum in quibusdam etiam deserere Plautus, tamen ne necesse quidem esse ut Megabyzo Menandrio Megabyzi filium Theotimum Plautus substituisse credatur. Quidni enim etiam apud Menandrum interroganti Nicobulo respondere mendacissimus seruus potuerit: *non quidem Megabyzus ipse, sed sane ex eo natus quidam Theotimus*. — ? Quid? quod rationem adeo perspicere licet, cur praemissam Chrysalis mendaciis Nicobuli interrogationem Plautus sustulerit. Namque qui Graecis Menandri aetate notissimi fuerunt Megabyzi siue sacerdotes siue aeditui Ephesiae Dianae, non item credibile est inter Romanos tam in uulgus notos fuisse, ut, qui de pecuniae apud Ephesios periculo audiret, nihil ei citius quam Megabyzorum recordatio succurreret. At, inquit, istos Megabyzos eunuchos prodiderunt Strabo XIV, p. 641. (950. a.) et, si dis placet, Heraclitus Epistola ad Hermodorum apud Politianum Miscellan. cap. 51. Nam sane apud reliquos scriptores supra memoratos nihil eiusmodi exstat. Mitto, quibus argutiis Meursii ineptias diluere Hemsterhusius instituit, mitto infelicissimam huius coniecturam Plautino uersui adhibitam: *Megalobyzus fidius*. Verumenimvero ad Plautum quidem eiusque fabularum spectatores quid tandem attinebat, accurate condiciones tenere illius sacerdotii? Quas ut largiar Menandri aequalibus non potuisse ignotas esse, tamen uel hic ipse tantum abest ut non potuerit Plautinae scenae conuenienter rem instituere, nihil ut factu fuerit commodius. Ecquid enim facetius, quam improbum seruum fidei faciendae causa primum negare, de quo quaesierat senex, Megabyzum aliquem fuisse, continuo autem ad captandam ueritatis speciem quandam cupidius iactare Megabyzi filium? quo apertissimo mendacio se ipse coarguere ridendumque praebere iis spectatoribus putandus est, quos Megabyzorum Ephesiorum condicionem tanquam rem tritam et peruulgatam illico recordatos cogitamus. Haud dissimilis aliqua ex parte ratio est responsi in Milit. glor. I, 1, 61.:

Rogitabant: hicine Achilles est, inquit, tibi?

Immo eius frater, inquam.)*

Atque haec disputaui uelut certo fundamento hoc nitens, quasi non controuersa Megabyzi uersu Plautino mentio esset. At uero in Palatinis libris Lipsiensique est *megalobuli*, in ueterrimis editionibus *megaloboli*: quemadmodum in iisdem *Nicobulus* scribitur *nicobolus*. Nam quod Pareus ex Palatinis *Megalobusi* affert idque eos tenere omnem fidem testatur in Analect. Plautin. p. 325.: de eo diligentem alioqui hominem, quantum ex Decurtato perspicio, oculorum acies fefellit. *Megabyzi* nomen primus commendauit Pius, haud contemnenda pro illius aetatis ratione uir eruditione, sed

*) Huic uersui aut eiecto *illarum*, aut hac transpositione succurrendum:

Immo, inquam, eius frater. Innuit illarum altera.

rudi et incondita, in cuius annotatione Plinii, Plutarchi, Aeliani, Diogenis, Quintiliani, Appiani de Megabyzis testimonia afferuntur omnia; in continuitatem autem uerborum Pium secuti receperunt Beroaldus, Pylades, Vgoletus, Carpentarius, Angelius (cuius exemplum Iuntinum Meursius significat de uetere codice loquens), Lucas Otchinenfis, Aldus, recipi iussit Turnebus; a quo non multum differt, quod Meursio placuit et Pareo, *Megabuzo*. Tantum autem apparet, si quid mutandum sit, non esse *Megabyzi* scribendum, sed *Megalobyzi*. Versui enim cum metueret Hemsterhusius, et ad metri leges aptius respondere hanc formam censeret:

N. Qui istic Theotimus est? C. Megabuli filius:

non cogitauit de lenissimo artificio, quæ uel caesurae rectius consulitur:

N. Qui istic Theotimust? C. Megalobyzi filius.

Nam quos reliqui *Μεγαβύζους*, eosdem ipse Strabo *Μεγαλοβύζους* nomine uocauit: ubi non erat, cur illud reponi Coraes *Σημειώσ.* p. 289. iuberet. Fatendum autem certe hoc est, non solos Plauti libros Palatinos cum in aliis Graecis tum in *y*, *z* litteris errasse frequentissime. Ac de *y* littera cum uix opus sit exemplis: testantur enim hoc *Chrisalus*, *Lidus* nomina in Bacchidibus, *Argirippus* in Asinaria, *Aegyptii* tum alibi tum Poen. V, 5, 12., *xittilis* uel *xutilis* in Pseud. I, 2, 76.: *zonam*, qui Palatinos scripserunt, exararunt *sonam* Merc. V, 2, 84., ubi *senam* Lipsiensis; qui autem Decurtatum, ibid. III, 4, 62. *Zacynthus* scripsit *acingthum* praemissa singulari nota quadam, quae nec litterae ullius est nec ab haesitabundo librario ipso uel intellecta uel certo consilio posita. Ita apud Quintilianum in quibusdam libris *megaburum* exstat, *negabusum* in ed. princ. Nolo enim corruptelae fontem ab ipsius aetate Plauti repetere, quem sane probabile est omnino non usum esse illis duabus litteris, quas ne Attius quidem et Ennius usurparunt, si uera tradiderunt Cicero et Marius Victorinus apud Conr. Schneiderum Gramm. lat. Elem. I, p. 376. coll. p. 39. Ut, si non ipsam illam, quae Pareo arrisit, *Megabusi*, certe non ualde dissimilem formam Plautus exarasse ipse uideatur.

Menandriae fabulae Plauto duce attribui fortasse quaedam ex incertis quae feruntur Menandri fragmentis poterunt, uelut Sententiarum singulare u. 423. Mein. 532. Brunck. οὐκ ἔστιν οὐδὲν κτῆμα κάλλιον φίλου, comparatus a Bothio cum Bacch. III, 2, 2.:

arbitror

*Homini amico, qui est amicus ita uti nomen possidet,
Nisi deos ei nil praestare.*

Sed nec huic exemplo multum tribuo, praesertim in aliqua frequentia similium apud Plautum sententiarum, ut Epidic. III, 3, 44.:

Nihil homini amico est opportuno amicius — :

nec hoc omne genus uideo cum proposita quaestione ita coniunctum esse, ut non possit missum fieri. Multo etiam minus tribuo ab eodem Bothio com. aratis Bacchid.

V, 2, 76. sqq. *) cum Amphidis e *Γυναικονομία* uersibus, qui sunt apud Athen. VIII, p. 336. c. d., nec tribuerem, si uel maxime certa imitatio esset: alioqui quid illis facias, quae de ueteri deque noua puerorum disciplina ab Lydo prolata Bacch. III, 3, 16. sqq., ad Aristophanis Nub. 961. sqq. imitationem composita post Lipsium Epistolic. Quaeest. III, 17. nuper Osannus iudicauit Comment. de Plauti Amphitruone in Mus. Rhen. a. 1834. p. 331.?

At, audio, Menandriae fabulae et Plantinae qualiscunque similitudo uno quodam fragmento corrui, quod ex Disexapatonte Fulgentius Myth. III, 1. p. 704. Stauer. attulit, cuius ὡς *Ἀντιέα* uerba nihil utriusque fabulae potuisse commune esse demonstrare uideantur manifesto. Itane uero? Quid enim, si personarum nomina seu cuncta seu nonnulla mutare latinus poeta consueuerit? Quod quidem Terentium certis testimoniis constat sic instituisse, quae uide apud Meinekium Men. p. 7, 67. uel Grauertum Analect. hist. et phil. p. 140. 154. Itaque ne de eo quidem licet ex Plantina fabula coniecturam capere, num Bacchidibus sororibus hoc nomen iam Menander fecerit: quemadmodum hunc scimus Glyceram suas delicias in aliqua fabula celebrasse (cf. Mein. p. 38. sq.), eundemque fortasse etiam Bacchidem amasiam, si uera sint quae p. XXVIII. et 303. Meinekii disputauit. Sed ne his quidem uersibus quicquam commune esse cum Plauti fabula potest.

§ 6.

Reuertor ad Bacchidum initium, quod cum per aliquot saecula creditum esset intercidisse, nostra quidem memoria exstitit, qui uanissimam omnem illam opinionem censens nihil quidquam deesse, sed integerrimam haberi fabulam et sibi persuaderet et aliis omnibus se crederet tam idoneis argumentis posse probare, ut nemo iam praepostera quadam antiquitatis reuerentia errare cum *prisca aetate*, quam cum noua malle uerum uidere uideretur. Tanta enim non consolita alioqui confidentia suam sententiam F. G. E. Rostius pronuntiauit edito a. 1811. Plautinorum Cupediorum ferculo secundo. Cuius integerrimi uiri non possum quin omnem disputationem satis esse leuiter institutam iudicem. Est autem ea tripartita. Ab Iuntinae enim editionis additamentis prospectus obscurum illorum auctorem ait p. IV., nisi inanis gloriae aut lucelli uano studio ad hoc exordium Plauto supponendum impulsus sit, non potuisse aliam male seduli

*) Versus anapaestico systemate comprehendendos puto:

Non tibi uenit in mentem, amabo,
Si, dum uiuas, tibi bene facias,
Iam pol id quidem esse haud perlonginquum:
Neque si hoc hodie amiseris, post in
Morte id uenturum esse umquam?

ueniat pro eueniat etiam I, 1, 46. libri et scripti et ante Camerarium editi omnes habent:

Quid si apud te ueniat desubito prandium aut potatio.

laboris causam habere, quam quod poetam aut prologo supersedere, aut personam eo, quem finxit, sermone loquentes in scenam introducere, aut utrumque non potuisse arbitraretur. Itaque primum prologi praemittendi nullam plane necessitatem esse studet earum exemplis fabularum ostendere, in quibus illam consuetudinem poeta omnino neglexerit, *Curculionis, Cistellariae, Epidici, Mostellariae, Miles, Persae, Stichus.* E quarum numero statim eximendae *Cistellaria cum Milite*, quibus non sine aliqua ratione *Mostellariam* iunxit *Eichstadius* de dram. com. satyr. p. 120.: in quibus non omnino neglexit, sed *post principium fabulae prologum induxit, ceterorum magnae auctoritatis poetarum veterum exemplo, ut ait Donatus praefat. extr. in Terent. Phormionem.* Contra addendae potius quaedam fabulae, quarum certe a Plauto profecti esse prologi nequeunt. *Nec uero ex iis causis, cur fabulis interdum praefandum esse poetae putarint, ut aut excusarent sese commendarentue, aut spectatoribus perplexius argumentum exponerent, aut plebis erga histriones iniuriam, aliosque peruersos mores notarent, quaeque plures cogitari possint, ullam Rostio p. V. uerosimile est Plauti animo in hac fabula scribenda obuersatam fuisse.* Atqui hoc nemo non uidet prorsus ita comparatum esse, ut non maiore iure affirmetur quam negetur. Vnde enim tandem istam suam Rostius hauserit scientiam? Enimuero de qua una causa ne nobis quidem iudicare negatum est, quae quidem pertinet ad ipsius fabulae argumentum, eam, si id sequimur, quod probabile uideatur esse, in contrariam potius partem ualere intelligemus, ubi, quam sit uel expeditum uel non expeditum *Bacchidum* argumentum, quaesierimus postea. Sed tamen concedimus disputationis summam: concedimus nullam Plauto fuisse prologi scribendi necessitatem, et ad alterum locum progredimur argumentationis Rostianae (p. V.). *Neque enim abruptum fabulae initium istam causam praebere de eius integritate dubitandi; manifestum esse eius Bacchidum, a cuius uerbis ordiatur fabula, sororem antea uerba aliqua, eaque non pauca fecisse: sed hoc etsi poeta persuasum cupierit spectatoribus, tamen non in scena fieri, sed priusquam uelum caderet factum cogitari eum uoluisse.* Hoc enim illud esse artificium, quo illudere poetas spectatoribus, ut in rem praesentem hi uenire, nec agenda fabulae, sed rei gerendae sese interesse arbitrentur; cuiusmodi fabularum ordiendarum rationem et plurimum habere gratiae et lenocinii, nec a Plauto neglectam alibi esse, ut *Asinariae, Casinae et Cistellariae* initiis. Adiici, ut arbitror, alia exempla Plautina potuerant; sed hoc ipsum quaeritur, num, quod artificium a Plautina arte minime abhorrere et nos concedimus liberaliter nec quisquam negauit, conueniat in *Bacchides*, an huius fabulae singularis quaedam ratio sit et in ipsa similitudine dissimilitudo? Sed tamen ut etiam hoc largiamur potius aliquantisper quam concedamus, quid tandem binorum ui argumentorum efficitur? Nihil profecto aliud, nisi parum idoneas Antonio Panormitae male seduli laboris causas fuisse; integram haberi Plauti fabulam probatur minime. Quae reliqua sunt, iis non tam probare sententiam suam, quam defendere ab aliorum dubitationibus animum induxit. Nam quod eius codicis Plautini, quem saeculo XV. e Germania perlatum in Italiam supra dixi, apographum in Marciana bibliotheca Florentina repertum sic doctissimus Laurentius Mehusius describit Praef. in Ambrosii Trauersarii Epist. et Orat. p. XLIII., ut duodecim posteriorum primam

fabulam esse *acephalam* dicat: id sane Rostio (p. VII.) facile credimus posse ad solam, quod desideretur, argumentum spectare: non posse ad ipsius initium fabulae, non concedimus. Ac ne illud quidem ita disputauit, ut non sit aliqua ex parte notandus. Nam quod suae necessitatem interpretationis argui eo dicit p. VII., quod argumentum Graecis *ἀκεφάλαιον* dicatur: nec, hoc Graece dicendum *ὑπόθεσις* fuisse, nec, a qua stirpe *ἀκεφάλαιος* ducatur, cogitauit. Praeterea ueterrimi illius codicis, e quo singularum fabularum Initia Mehufius excerpfit, librarium ait uariandae orationis gratia modo *argumentum* modo *prologus* modo *incipit feliciter* uocabulis usum esse. Hoc etiam ab nostra causa alienum possum missum facere, tamen uerum quidem non est; in una enim Pseudolo erratum est plurimis in libris in hunc modum, ut turbatis Mercatoris et Pseudoli confiniis illi fabulae continuenter duo prologi uersus, qui est Pseudoli, huic autem praemissa *Prologus* inscriptione, quae illuc pertinebat, argumentum perscribatur. Denique nec illud uim habet ullam, quod ex eiusdem Mehufii uita Ambrosii p. 388. Rostius p. VIII. attulit alius codicis, quo Excerpta tenentur complurium scriptorum, haec uerba: *Incipiunt Notabilia de comoediis Plauti nouiter reperiis, quae sunt XII, et primo de Bacchide, cui deficit principium.* Quod non minus est ambigue dictum, quam cum *acephala* fabula uocatur, sed, quandoquidem in inquirendis testimoniis adhuc disputationem continuimus, ne in censum quidem uenit prae illis, quae § 2. sunt congesta.

§ 7.

Aegre autem feras aliud argumentorum genus, quod suapte natura grauissimum consulto huic loco reposuimus, adeo ab Rostio neglectum, ut uix in transcurso leuiter tetigerit p. V. Vbi parum se moueri Camerarii sententia dicit, qui ex *Bacchidibus Plauti* ait p. 418. *adducuntur a Charisio, quae in hac fabula non leguntur, ut esse mutilam illam facile existimare possimus.* Et interposito de nouiciis Panormitae commentis iudicio: *Fulgentius quidam interpres ueterum nominum, Nasiternam adducit de Plauti Bacchide, Nasiternam cum aqua feras. Nescio an alia illa fabula fuerit: nam huius nomen est Bacchides.* Et apud Fulgentium quidem p. 563, 31. hodie legitur *Plaut. Bacch.*; quodsi legeretur *Bacchide*, ut in Mehufii codice antea commemorato, non maioris hoc momenti esset, quam quod idem leuissimus quidem homo Fulgentius p. 564, 4. e *Plauti Chryfalo* citat Bacchidum uersum II, 3, 44.: quode Osannus dixit *Analect. crit.* p. 164.: uel quod *Bacchae* nostram fabulam inscribi in codice San-Danielensi Car. Wittius testatus est in *Blumi Biblioth. libr. mss. Ital.* p. 232., itemque Charisius p. 176, 12. *Putsch.* Plautum prodit *ampliter* pro *ample* dixisse in *Bacchis* h. e. Bacchidum IV, 4, 26. Contrario uitii genere affectus Sertius in *Virg. Aen. XII*, 605. uersus protulit ex *Attii Bacchidibus* h. e. e *Bacchis*, quos quidem Pareus non dubitauit reponere in Plautinae fabulae fragmentis. Sed Rostium demiror sane tam sicco pede illarum uelut fluctus dubitationum praeterisse, ut neminem ignorare diceret, saepe grammaticos in citandis librorum titulis allucinatos esse, ipsumque Fulgentium errasse, qui quae in *Stichi II*, 2, 18. se legere

uerba meminisset *nasiternam cum aqua*, in Bacchidibus reperiri temere contenderet. Ac de Fulgentii testimonio uiderimus deinceps: cuius quidem uentossissimi hominis satis hodie perspecta uanitas nullo pacto componi cum ceterorum grammaticorum diligentia debet. Sed scire uelim, quam saepe in commemoranda Bacchidibus hallucinatos istos grammaticos Rostius putarit? Quanto ab hac parte consultius duobus ante saeculis Iosias Mercerus iudicarat, cui fragmentorum multitudo ab uno Nonio ex Bacchidibus citatorum, in hodiernis autem exemplis non repertorum, satis praebere causae uidebatur, cur de duabus eius fabulae editionibus cogitaret Notis in Nonium p. 676. 696. 761. 642., quanquam non uberius expositis rationibus eius sententiae. Nec Ianum Gulielmum uis fugit illius multitudinis; sic enim Quaestionum in Plauti Bacchides caput I. orditur: *Bacchides Plauti fabulam mutilam hodie et truncam multis partibus circumferri compluria argumento sunt. primum prologi et prooemii nihil, quod argumentum, ut solet, explicet, et in rem ipsam spectatorem inducat. tum in medio grammaticorum testimonia, quae frustra quaeras in ea quam nunc terimus.* Rursus autem quanto idem ille, cuius equidem minime probo coniecturam, Mercerus consultius tamen quam Fridericus Osannus egit, qui Analectorum criticorum Berolini editorum a. 1816. capite X. in recensio-um diversitatem exemplarium Plautinorum dedita opera inquirens huius quoque, in qua uersamur, fabulae duplicem agnoscere recensio-um et sibi uisus est et aliis persuadere studuit adeo neglecto illo argumento-um genere, quo usus iam Mercerus erat, ut ne unum quidem fragmentorum ex Bacchidibus a grammaticis repetitorum suae adhiberet disputationi. Quae autem et qualia ipse argumenta in medium protulerit, post paullo, simulatque alius rei mentionem fecerimus item ab Osanno praetermissae, uidebimus. Apprime enim congruere in duplicis recensio-um suspicio-um debuerat memorabile Charisii testimonium uideri p. 184, 7.: *Meditate. Plautus in Bacchidib. Aedepol nae tu illorum mores perquam meditate tenes. in quibusdam non ferunt.* Apertum est exemplarium discrepantiam significari, in quorum parte non legatur ille uersus, qui est III, 6, 16. Corruptum enim *ferunt* est ex *feruntur*, idemque uerba illa ualent, quod non raro apud Graecos obuia ἐν τισὶν οὐ φέρεται. *) Manasse autem eam notitiam puto ex ueteris scholiastae commentario: quod quidem non leuiter dico. Notabile est enim, in codice Palatino altero s. decurtato uoculis Plautinis *ne et perquam meditate* superscriptas eadem quidem ueteri manu has esse: *certe, ualde sapienter.* Eiusmodi glossmata

*) Nam cum *ur* syllaba scribendi compendio hoc notaretur *ferunt*, non raro peccatum est in utramque partem. Sic Bacch. I, 1, 10. *reuchatur* in Ed. princ. corruptum est in *reuehat*, V, 2, 13. *intuentur* in Decurtato in *intuent*. Contra pro *cruciat* III, 3, 89. Ed. princeps cum Lipsiensi cod. exhibent passiuum: in iisdemque libris legitur quod uulgatum est III, 6, 19. *frustrantur*, cuius emendandi uiam monstrat Decurtati scriptura *frustrant*:

'Atque hi se cum frustrant, frustrari alios stolidi existmant.

Simillimaque ratione uulgatum IV, 9, 16. *geruntur*, quod praeter principem editionem etiam Vetus codex tenet, corrigendum ex Decurtato Lipsienfisque sic est:

Hunc ipsum exurit. 'Ego sum Vlizes, cuius consilio haec gerunt.

non ab nouiciis hominibus scripta ille codex tenet tam rara, ut non possit singularis quaedam earum ratio esse. *) Iam uero cum allato exemplo compara ab eodem Charisio, uel potius, ut commode nuper G. Freundius admonuit Praef. in Lex. lat. ling. p. LXXIII., ab Iulio Romano Comminianoue seruata Aruntii Celsi, Flauii Capri, L. Cornelii Sisennae in Plautum scholia, quae uno in conspectu posita habes in Suringari Historiae crit. scholiastar. Lat. P. I, p. 70. sqq.; compara uelut illud apud Charis. p. 196, 15. *tractim*] *Plautus in Amphitryone. Vbi Sisenna pro lente inquit;* uel cum apud eundem idem in eadem fabula *examuffim* pro *examinato*, uel *tuatim* pro *tuo more* positum esse dicit. Sed ut illum in Bacchidibus uersum siue Sisenna siue alius quilibet desiderari in quibusdam exemplaribus dixerit: quid tandem inde consectorium? Nihil profecto grauius quam ex eo, quod in prima Bacchidum scena unus quidam uersus bis scriptus est, u. 40., qui iam aderat post u. 30., recte priore fabulae loco expungi iussus ab Acidalio Diuin. et interpr. in Bacch. cap. 1. (in Gruteri Thes. crit. VI, p. 194. sq.), expunctus a Bothio. At, inquit, satis grauis haec ipsa iteratio Ofanno uisa est: ut quo altero ex duobus argumento demonstrandae duplicis recensionis usus sit. Audio. Verumenimvero, ut simile genus contendam, quotus quisque scriptus liber est uelut Graecorum poetarum scenorum, quin in eo aut omissus aliquando unus aliquis uersiculus sit incuria librariorum: (atque abesse salua sententia ille potuit, qui est Bacch. III, 6, 16., nec alienum hoc genus negligentiae a Plautinis libris fuisse cum alibi ostendimus tum luculentissimo documento codex rescriptus Ambrosianus exstat:) aut non suo loco iteratus procliui scribentis lapsu. Quemadmodum in ipso altero Palatino non paucos uersus inter scribendum praetermissos librarius in marginibus adiecit: unde quam facile ab aliis in fabulae continuitatem inferi alienis locis potuerint, non est quod persequar longius. Atque perperam iteratorum uersuum exempla in ipso Bacchidum initio Palatini libri praebent, in quorum ueteri I, 2, 60. 61. et suo loco et ante u. 58. positos Pareus testatur cum Grutero; in altero autem I, 1, 73. et 74. sic scripti sunt:

Nā ut naui uectes credo timida es. aliquantū soror

Simul huic nescio qui turbare quihuc it decedamus

Nā ut innaui uectes credo timida es aliquantū soror.

Non magis autem altero moueor Ofanni argumento, ut duplicem mihi fabulae recensionem persuaderi patiar siue ab ipso poeta siue prisca aetate dedita quidem opera et certo consilio factam. Nam sane si quaslibet uel librariorum turbas uel sciorum lusus habere recensionum in numero animum induxeris, nec ego litem Ofanno moueo.

**) Vt prorsus mittam appictas scripturae discrepantias (quarum quidem etiam maior quam in Decurtato multitudo est in Vetere), solas quae superscriptae sunt explicationes ex una fabula afferam. Bacch. IV, 7, 16. *uenire*] *i. uendi*, quod transit in ed. princ. IV, 8, 42] *inque*] *dic* (eo enim ualet calami errore scriptum *dio*.) IV, 9, 2. *menitum*] *pro munitum*. IV, 8, 60. *i. uise estne*] *imp. exūbo* eo, quae quid sibi uelint nondum exputaui.

Nec enim alio ex fonte eorum in Bacchid. III, 4. uersuum conditionem repeto, quae infra posui, ut a u. 14. in optimis libris scripti sunt:

*Verum quam illa umquam de mea pecunia
Ramenta fiat plumea propensior, 15
Mendicum malim mendicando uincere.
Numquam edepol uiua me irridebit: nam mihi
Decretumst renumerare iam omne aurum patri.
Igitur mihi inani atque inopi subblandibitur
Tum, cum mihi nihilo pluris referet,*) 20
Quam si ad sepulchrum mortuo dicat iocum.
Sed autem quam illa umquam meis opulentiis
Ramenta fiat grauior aut propensior,
Mori me malim excruciatum inopia.
Profecto stabile est me patri aurum reddere. 25
Eadem exorabo, Chrysale causa mea
Pater nē noceat neu quid ei fuscenseat e. q. f.*

Horum uersuum 14 — 18. et 22 — 25. Osannus geminas partes esse duplicis recensionis censuit p. 201., male seduli grammatici studio in nostris exemplaribus conglutinatas. Vellem addidisset, utri fidei plus tribueret: quam in rem uti commodissime Nonii testimonio poterat, uersum 15. e Plauto sine fabulae nomine afferentis p. 222, 5. cum leui corruptela *plumbea*, quam pro uulgato ante Pyladem *plumia* a Pio commendatam suscepit Carpentarius. Longe ab Osanni ratione diuersam uiam Bothius ingressus temere utriusque partis uersibus mixtis et confusis protulit, quod probari nullo modo possit. Sed ne Osannus quidem satis fecisse iudicari potest: nec enim apto sententiae uinculo u. 26. uerba *eadem exorabo* e. q. f. coeunt cum uersuum 19 — 21. sententia. Quapropter ego ex interpolationis societate eximendum u. 25. statuo, ut hoc ordine singuli uersus antiquitus sese exceperint: *Decretumst — Igitur mihi — Tum cum mihi — Quam si ad — Profecto — Eadem exorabo —*. Etenim imprimis apposita ad Mnesilochi animum describendum repetitae u. 18. et 25. sententiae grauitas est. Qui quod antea se decernere dixerat simpliciter, de eo paullo post magis magisque confirmato consilio multo etiam fortius *profecto* ait *stat sententia, a qua non me patiar auelli*. Illis autem *me patri aurum reddere* (imperite enim Bothius *patri me aurum reddere*) tam apte annectuntur quae consequuntur *eadem exorabo*, nihil ut ad sermonis concinnitatem desideretur. Nec enim rara locutio *stabile est* credi potest interpretando *decretumst* esse adhibita; nec pro uersus 25. interpretatione priorem illum 18. habebit, qui quid in hoc genere criticae artis ratio postulet, perspexerit. Qui autem reliqui sunt tres uersus, eos sane deberi scioli alicuius sedulitati credo, in uersuum speciem concinnantis quae interpretationis causa ascripta uideret.

*) De hoc uersu dixi in editione Bacchidum.

Quod quidem cum de u. 22. 23. sua sponte intelligatur: nam ut taceam ineptissime sociata *gravior aut propensior*, nec numeros prioris uersus placere cuiquam puto, nec *opulentiae* uel usitate dicuntur uel satis opportune: consequens est etiam ad u. 24. pertinere. Cuius duplex hiatus, etsi minime carens exemplis ac defensus ab Lingio Quaeft. Plaut. p. 21., tamen in reliquorum ui argumentorum suspicionem anget. Neque enim futilissimi supplementi e Schobingeri codice proditi, a Pylade autem, Vgoletto, Angelio, Aldo suscepti: *mori me malim misera excr. inop.* ulla ratio habenda, nec Camerariae scripturae *mori me mauelim*, nec Bothii commentorum olim *moriri malim med* proponentis, nuper *moriri malim excr. me inopia* amplectentis. Vnum quod aliquid dubitationis iniiciat, illud est *sed autem*, quod in Palatinis scriptum exstat pro uulgato per omnes editiones et Lipsienfem codicem *sed ante*: sed tamen ne hoc quidem esse eiusmodi uidetur, ut non potuerit ex ipsius imitatione Plauti nasci. Confer Rud. II, 5, 15. Truc. II, 3, 14.

§ 8.

Restant quidam Bacchidum uersus, quos etsi Osannus non in duplicis recensionis societatem asciuit, tamen non praetermisit Analectorum capite IX., quo *interpolationem* fabularum Plautinarum indagare studuit. Namque a Plauto profectos esse hos uersus negat IV, 9, 149. sqq.:

*Sed, spectatores, uos nunc ne mirèmini,
Quod nòn triumpho. peruulgatum est: nihil moror.
Verùmtamen accipièntur mulso milites.
Nunc hanc praedam omnem ad quaestorem dēferam.*

Quorum fidem operae pretium est audire, quibus argumentis impugnarit. Quod Ciceroni ait in Pis. 25. *de uana triumphandi cupiditate et studio declamare licet, non idem a Plauto dici poterat, cuius aetatem uix plus quam duo triumphi, alter Marcelli a. V. C. 531., alter P. Scipionis Africani a. 549. [immo 552.] attigerunt; quo tempore si Plautus triumphandi morem ut peruulgatum et tritum propinauisset deridendum, non posset non ineptus uideri. Ad ea potius tempora Plautinus locus spectat, ubi triumphandi frequens usus in abusum uerterat.* Quae ubi primum legebam, aliquamdiu animi perturbatus, mox uelut longinquae memoriae recordatione de Liuū in hoc genere diligentia admonitus coepi triumphorum exempla circumspicere, reperta disponere, conquisitorum numerum computare, cum lectis relectisque Osanni uerbis comparare: postremo uix mihi ipse non dissidens tamen credere sum coactus, quod persuasit oculorum fides. Quippe quinque ab urbe condita saeculis, si ne regum quidem tempora praetermittimus, triumphatum est centies uicesies septies, ab initio autem sexti saeculi ad mortem M. Atti Plauti, quae accidit a. 569. aerae Capitolinae, quadragies bis, hoc est quadragies praeter binarium numerum Osanni, itemque praeter ouationes. Quodsi quis tantum aberrare a ueritate Osannum potuisse dissidat, suadeo ut Fastos consulares et triumphales adeat uelut a praestantissimo Onuphrio Pan-

uinio compositos in edit. Venet. a. 1557. p. 200. sqq., uel ab Sigonio Oper. orna. ed. Mediol. a. 1732. uol. I, p. 11. sqq. Nunc autem perentitiscisne, quam commode peruulgatum triumphandi morem dicere is poeta potuerit, quem haud ita multo post initium sexti saeculi natum esse oporteat? quandoquidem probabiliter de eius natalibus Windischmannus disputauit l. c. p. 121. Praeterea autem minime negligere illud Osannus debebat, quod, in quibus uersamur Bacchidum uersibus, eis Chrysalus respicit prius a se dicta eiusdem scenae u. 47. sq.:

*Nunc alteris etiã ducentis usus est, qui dispensentur
Illo capto, ut sit mulsum, qui triumphent milites.*

Sed nondum missum facio hunc locum, ex quo si minus cogere argumentandi necessitate, at coniecturae certe probabilitate assequi posse actae Bacchidum tempus uidemur. Nam cum sit consentaneum in ipsis temporum rationibus aliquid causae quaerere, cur leui irrisione triumphandi honorem poeta perstrinxerit, ego quidem imprimis commoda eius irrisionis tempora duo potissimum reperio, finiti Philippici belli, et belli Antiochini. Posteaquam enim inter a. 535. et 542. nullus decretus fuerat triumphus, nullus a. 543. 545., ab a. 547. ad 552. item nullus, nullus denique a. 554. 555., secuta sunt ea tempora, quibus propemodum continua exstitit triumphorum sese excipientium frequentia. Bis est triumphatum a. 556. ab C. Cornelio Cethego de Insu-
bribus Cenomanisque, ab Q. Minucio Rufo de Liguribus Boiisque Gallis (Liu. XXXIII, 22. sq.); a. 557. de Comensibus et Insu-
bribus ab M. Claudio Marcello (Liu. c. 37.), a. 558. ab Q. Minucio Thermo ex Hispania citeriore (Liu. XXXIV, 10.), ut ouationes praetermittam Cn. Cornelii Lentuli et M. Heluii Blafionis, de quibus Liu. ibid. et XXXIII, 27.; bis deinde a. 559. ab M. Porcio Catone ex Hispania, ab T. Quinctio Flaminio de rege Philippo ex Macedonia (Liu. XXXIV, 46. 52.). Sed tamen habeo, cur aptius etiam in proxima tempora conuenire Plauti uerba putem. Missa enim M. Fuluii Nobilioris ouatione (Liu. XXXVI, 21. 39.), de Boiis Gallis a. 562. triumphum egit P. Cornelius Scipio Nasica, a. 563. de Aetolis et rege Antiocho M. Acilius Glabrio (Liu. XXXVI, 40. XXXVII, 46.); proximus autem annus quaternos triumphos uidit L. Cornelii Scipionis Asiatici, naualemque L. Aemilii Regilli de rege Antiocho, Q. Fabii Labeonis item naualem ex Creta (Liu. XXXVII, 59. 58. 60.), et L. Aemilii Paulli ex Hispania ulteriore (Vellei. Paterc. I, 9. coll. Sigon. comment. in Fast. p. 316.); quos uno interiecto anno secuti sunt a. 566. M. Fuluii Nobilioris de Aetolis et de Cephallenia, et Cn. Manlii Vulsonis de Gallis Asiaticis triumpho (Liu. XXXIX, 5. 6.); nullus autem proximis annis ad mortem Plauti. Habes multitudinem satis ut uidetur idoneam, cur peruulgatus diceretur mos triumphandi; nondum habes rationem, cur in summa frequentia amplissimum honorem parum se curare Chrysalus dixisse uideatur. Et si igitur iam Minucium Rufum non satis triumphandi honore dignum tribunis uisum Liuius memorat, et si eundem honorem non sine aliqua tribuni intercessione tum Scipionem Nasicam impetrasse tum Fuluium Nobiliorem narrat XXXVI, 39. XXXIX, 4.: tamen haec leuia fuerunt nec comparanda cum acerrimis certaminibus, quibus peruicacissima contradicentium repugnantia superanda Manlio Vul-

lopi, ac multo etiam magis Fabio Labeoni fuit. Ac de Cn. Manlio quae Liuius XXXVIII, 44 — 50. memoriae prodidit, faciunt ut anceps sit iudicium; sed Q. quidem Fabio neminem unquam indigniorem ad triumphi honorem accessisse, satis aperte ab eodem declaratum est XXXVII, 60. et XXXVIII, 47. Quippe *triumphauit, quem non bellum iniustum gessisse, sed hostem omnino non uidisse inimici iactabant*. Nunc igitur si licet coniecturam facere ex eo, quod sit probabile, annum V. C. 564. credo eum fuisse, quem non longo interuallo secuta sit eius fabulae Plautinae actio, in qua peruulgatus triumphandi mos dicatur multumque de prisca eius dignitate esse detractum significetur.

Eo deduximus disputationem, ut reiectis aliorum de Bacchidibus opinionibus iam, quam in illarum locum sententiam ipsi substituamus, exponendum sit. Quo in genere tripartita omnis quae restat opera nostra erit. Primo enim loco accuratius examinato et perpenso ipsius fabulae argumento demonstrabo, non posse eam sic ut hodie fertur e poetae manibus prodisse, sed quarundam ab initio partium iacturam fecisse prorsus ad argumenti integritatem et audientium expectationem necessariarum. Secundo loco diligenter compositis eis uersibus, qui ex Bacchidibus excerpti a ueteribus grammaticis non exstant in nostra fabula, nullum esse ostendam, qui in argumentum cum totius fabulae tum desideratarum partium illarum non aut manifesto conueniat aut possit certe sat commode conuenire. Tertio denique loco, quid ex pertractatis primo et altero loco efficiatur, ita quaeram, ut, quae qualesque fuerint, quas intercidisse scenas intellexerimus, probabiliter definiatur.

Atque haec quae restant curabimus ut foras dentur propediem: nunc ueniendum ad id est, quod hanc praefandi necessitatem non iniucundam nobis imposuit. Nam quo nuper honorifico Professoris Publici Ordinarii munere summa nos Regis clementia ornatos uoluit, id, ut legi academicae satisfiat antiquitas sancitae, publica oratione rite auspicabimur. Cui orationi de studii philologici et scholasticae institutionis necessitudine habendae uti beneuole adesse uelint, GRAVISSIMVM ACADEMIAE CVRATOREM, RECTOREM EIVSDEM ACADEMIAE MAGNIFICVM, PROFESORES ET DOCTORES ILLVSTRISSIMOS, COMMILITONES ORNATISSIMOS qua decet obseruantia rogamus, inuitamus.

